

Iðnaðar og tækjadeild, skýrsla á aðalfundi 2026

Ágætu félagar!

Að venju verður á þessum aðalfundi farið yfir það helsta sem gerst hefur á liðnu starfsári. Haldnir hafa verið þrír stjórnarfundir frá síðasta aðalfundi deildarinnar, sem haldinn var 4. febrúar í fyrra.

Tíunda þing Starfsgreinasambandsins var haldið á Akureyri dagana 8. – 10. október, en þar átti Eining – Iðja 15 fulltrúa. Þingið tókst mjög vel í alla staði og samþykktar voru sjö ályktanir, þ.á.m. um húsnæðismál, byggðamál og kjaramál.

Samkvæmt gildandi kjarasamningi hækkuðu laun nú um áramót. Kauptaxtar hækkuðu þá um 5,3% en að lágmarki um 23.750. Laun þeirra sem ekki eru á taxtalaunum, heldur almennum mánaðarlaunum, hækkuðu um 3,5% en þó að sama lágmarki. Kjaratengdir liðir samningsins hækkuðu einnig um 3,5%.

Ég hvet ykkur til að fylgjast vel með hvort umsamdar launahækkanir hafi skilað sér og hafi birst með réttum hætti á launaseðli janúarmánaðar.

Vert er að minna á að orlofsréttindi félagsfólks á almenna markaðinum voru aukin í tveimur þrepum, en frá 1. maí 2024 og 1. maí 2025 breyttist ávinnsla orlofs.

Eftir fyrri breytinguna var staðan sú að.

- Lágmarksorlof ennþá 24 dagar eða 10,17% en talað er um lágmarksorlof byrjenda.
- Það kom nýtt inn að starfsmaður sem náð hefur 22 ára aldri og starfað hefur í 6 mánuði í sama fyrirtæki skuli eiga rétt á orlofi í 25 daga og orlofslaunum sem nema 10,64%.
- Starfsmaður sem unnið hefur í 5 ár í sama fyrirtæki á rétt á orlofi í 26 virka daga í stað 25 áður og orlofslaunum sem nema 11,11%.

Seinni breytingin varð frá og með 1. maí fyrra vegna ávinnslu orlofs sem kemur til töku á orlofsárinu sem hefst 1. maí í ár.

- Þá mun breytast að starfsmaður sem unnið hefur í 5 ár í sama fyrirtæki mun eiga rétt á orlofi í 28 virka daga í stað 26 áður og orlofslaunum sem nema 12,07% í stað 11,11 áður.

Engin breyting varð á reglu um starfsmenn sem starfað hafa í sama fyrirtæki í 10 ár.

Viðkomandi starfsmaður á áfram 30 daga orlofsrétt og 13,04% orlofslaun.

Ég hvet ykkur til að skoða launaseðilinn vel og ef þið sjáið að orlofsprósentan er ekki rétt þá skuluð þið tala við ykkar yfirmann eða heyra í félaginu.

Frá og með 1. janúar sl. hækkuðu einstaklingsstyrkir fræðslusjóða félagsins úr 130.000 í 180.000 miðað við full réttindi. Uppsafnaður tveggja og þriggja ára réttur fyrir árin 2023-2025 verður áfram 130.000 á ári miðað við full réttindi. Hækkun í 180.000 á einungis við frá og með síðustu áramótum.

Ég vil minna á heimasíðu félagsins, ein.is, þar sem m.a. má nálgast ýmsar gagnlegar upplýsingar um félagið. Ég minni líka á síður félagsins á Facebook og Instagram þar sem við setjum inn alls konar kynningarefni.

1. nóvember 2024 tók félagið í notkun Mínar síður félagsins. Óhætt er að segja að félagsmenn hafi tekið vel á móti þeim og verið duglegir að nýta sér það sem þar er í boði. Frá upphafi og fram til síðustu áramóta voru innskráningar félagsmanna orðnar um 35.000. Á sama tíma var búið að nota kerfið til að framkvæma rúmlega 1.900 bókanir í orlofskerfinu.

Mínar síður félagsins eru mjög notendavænar, byggjast upp á persónublaði félagsmanns sem veitir góða yfirsýn yfir stöðuna. Þar má m.a. finna yfirlit yfir félagsgjöld, sjá réttindi í sjóðum og hvernig þau hafa verið nýtt. Þar inni er einnig pantað eða sótt um og greitt fyrir orlofshús og sótt um fræðslustyrki, sjúkrastyrki og sjúkradagpeninga. Þá er hægt að skrá starfsstöð, senda inn fyrispurn til félagsins eða stofna mál. Jafnframt er hægt að fylgjast með réttindaávinnslu og skilum atvinnurekenda á iðgjöldum.

Slóðin inn á Mínar síður er mitt.ein.is en á heimasíðu félagsins má finna góðar leiðbeiningar fyrir helstu aðgerðir þar inni

Ég hvet alla sem eiga eftir að fara þarna inn til að gera það og uppfæra ef þarf upplýsingar eins og símanúmer, netfang og bankaupplýsingar.

Ég vil minna á félagsmenn geta farið á fjölmörg námskeið sem í boði eru hjá SÍMEY sér að kostnaðarlausu. Ég bendi öllum áhugasömum að kíkja inn á heimasíðu SÍMEY til að sjá hvað er í boði.

Gallup hefur framkvæmt kjara- og viðhorfsskönnun fyrir félagið frá árinu 2011.

Niðurstöður síðustu könnunar lágu fyrir í desember og er óhætt að segja að enn og aftur er mikil ánægja með þjónustu félagsins og félagið sjálft.

Þarna eru margir þættir kannaðir, m.a. er spurt um heildarlaun og dagvinnulaun, vinnutíma, vinnutímastyttingu, fjárhagslega stöðu, trúnaðarmenn og Mínar síður félagsins. Heildarniðurstöðu könnunarinnar má finna á heimasíðu félagsins.

Nú er félagið ekki lengur með sérstaka vetrarleigu orlofshúsa. Inn á Mínum síðum er hægt að bóka og greiða fyrir orlofshús eða íbúð í um sex mánuði fram í tímann, fyrir utan tímabil sumarúthlutunar.

Einnig er kominn sveigjanlegri leigutími í íbúðum félagsins á Höfuðborgarsvæðinu, en frá byrjun janúar hafa verið í boði dag- og helgarleigur, eins og verið hefur í orlofshúsum félagsins. Á sumrin, um jól, áramót og páska verður eftir sem áður einungis vikuleigur í boði í öllum orlofskostum félagsins.

Búið er að taka nýjar íbúðir félagsins í Eirhöfða 7 í Reykjavík í gagnið, en á síðasta ári var ákveðið að selja fjórar íbúðir félagsins í Sóltúni og Ásholti og kaupa sex nýjar íbúðir í þeirra stað.

Við erum nú með átta orlofsíbúðir í boði fyrir félagsmenn á Höfuðborgarsvæðinu, þrjár í Álalind í Kópavogi og fimm í Eirhöfða í Reykjavík. Einnig eru þrjár sjúkraíbúðir í boði fyrir sunnan, tvær í Álalind og ein í Eirhöfða

Þá hefur félagið tekið á leigu íbúð á Spáni út nóvember á þessu ári. Íbúðin er á góðum stað í Playa Flamenca á Spáni, í lokuðum íbúðakjarna og samanstandur af tveimur svefnherbergjum, tveimur baðherbergjum, eldhúsi og stofu/borðstofu. Um er að ræða rólegt og vinsælt íbúðarhverfi við Costa Blanca-ströndinni á Spáni.

Inn á Mínunum síðum geta félagsmenn fengið allar upplýsingar um íbúðina og bókað hana sex mánuði fram í tímann, líka yfir sumartímann þar sem hún verður ekki inn í úthlutunarkerfi sumarsins. Nú gildir reglan fyrstur bókar, fyrstur fær. Hægt er að leigja eina eða tvær samfelldar vikur og eru skiptidagar á þriðjudögum.

Allar upplýsingar um orlofskosti sumarsins verða aðgengilegar á heimasíðu félagsins í mars. Áfram verður gott úrval sumarhúsa í boði og Orlof að eigin vali verður áfram í boði. Styrkurinn í ár verður 29.000 kr. og verða í boði 300 styrkir eins og áður. Sækja þarf um orlofshúsin og styrkinn í gegnum Mínan síður félagsins og verður umsóknarfrestur auglýstur síðar.

Ef einhver þarf á aðstoð að halda við að sækja um orlofshús eða Orlof að eigin vali þá verður hægt að mæta á skrifstofurnar og fá aðstoð við það að sækja um.

Í boði verða tvær ferðir hjá félaginu í ár.

Uppselt er í ferð til Hollands og Þýskalands dagana 4. til 11. júní.

Dagsferð eldri félagsmanna er áætluð í ágúst og verður hún auglýst er nær dregur.

Mig langar að minna á að á skrifstofu félagsins á Akureyri eru nokkrir ráðgjafar hjá VIRK starfsendurhæfingarsjóði með aðstöðu.

Fyrir þá sem ekki vita þá er þjónusta VIRK fyrir einstaklinga sem búa við skerta starfsgetu vegna heilsubreysts og stefna að aukinni þátttöku á vinnumarkaði. Ef þið viljið fá nánari upplýsingar um VIRK þá má t.d. nálgast þær á heimasíðu félagsins.

Ég vil að lokum þakka Svavari og Þormóði sem nú láta af stjórnarstörfum fyrir gott samstarf á liðnum árum. Ég vil líka þakka stjórninni fyrir vel unnin störf og ánægjulegt samstarf á starfsárinu. Einnig þakka öllum þeim sem ég hef starfað með á liðnu ári fyrir ánægjulegt samstarf og viðkynningu og þá ekki síst Ástu Guðnýju Kristjánsdóttur starfsmanni deildarinnar.

Takk fyrir.